

12/03/2002

Seri Paduka kagumi cara kerajaan pulih ekonomi

Hazmir Bakar; Tuan Nazuri Tuan Ismail

KUALA LUMPUR, Isnin - Yang di-Pertuan Agong, Tuanku Syed Sirajuddin Syed Putra Jamalullail bersyukur kerana tindakan pantas kerajaan berjaya mengelakkan Malaysia daripada terjerumus ke dalam kemelesetan ekonomi berikutan suasana ekonomi dunia yang lembab.

Seri Paduka bertitah, langkah kerajaan termasuk memperkenalkan pakej rangsangan berjumlah RM7.2 bilion dan dasar kewangan yang disesuaikan bagi menyokong rangsangan fiskal tanpa meningkatkan kadar inflasi, membolehkan ekonomi negara terus berkembang dan rakyat hidup aman makmur.

"Semuanya ini diperoleh melalui pentadbiran Kerajaan beta yang berwibawa di bawah pimpinan memanda beta, Datuk Seri Dr Mahathir Mohamad, yang mendapat sokongan padu rakyat," titah baginda di istiadat pembukaan Penggal Keempat Majlis Parlimen yang Ke-10 di Dewan Rakyat, di sini hari ini.

Baginda bertitah, walaupun menghadapi masalah, asas ekonomi Malaysia masih kukuh dan membolehkan pertumbuhan, khususnya menerusi kegiatan ekonomi dalam negara yang diterajui sektor swasta.

Bagi terus merangsangkan ekonomi negara, kegiatan sektor pertanian dan sektor pertumbuhan baru yang mencorakkan ekonomi dekad ini, akan diperhebatkan termasuk penekanan kepada ekonomi berasaskan pengetahuan, selain menarik pelaburan berkualiti tinggi serta mengekalkan kos yang rendah dalam menjalankan perniagaan.

Malaysia, titah baginda, akan terus kekal sebagai destinasi pelaburan asing yang menarik walaupun menghadapi persaingan daripada negara membangun lain.

Tuanku Syed Sirajuddin bertitah, hasrat menjadikan Malaysia negara perdagangan antarabangsa semakin tercapai dengan kekerapan persinggahan kapal dagang dan jumlah perdagangan yang dikendalikan Pelabuhan Klang dan Pelabuhan Tanjung Pelepas.

Ini menjadikan Malaysia negara perdagangan yang ke-17 terbesar selain menjadikan Pelabuhan Klang sebagai pelabuhan kontena ke-13 terbesar di dunia.

Seri Paduka juga bersyukur pelaksanaan program Pembangunan Masyarakat Perdagangan dan Perindustrian berjaya mencapai matlamat meningkatkan penyertaan langsung Bumiputera dalam aktiviti perniagaan dan sektor ekonomi yang strategik.

Baginda turut yakin Pelan Pembangunan Pendidikan 2001-2010 akan dapat menghasilkan golongan pekerja yang berilmu, berkemahiran tinggi, berpekeriti mulia serta dapat menyesuaikan diri dengan cabaran globalisasi, liberalisasi dan ekonomi berasaskan pengetahuan.

Mengenai isu sosial, Seri Padukan bertitah, pembangunan desa juga akan diperhebatkan dengan tumpuan diberikan kepada pembangunan prasarana bagi meningkatkan kualiti kehidupan masyarakat desa serta menjadikannya pemangkin pertumbuhan ekonomi serta penggunaan teknologi maklumat dan komunikasi.

"Program Perumahan Rakyat juga akan dilipat gandakan bagi memastikan semua lapisan rakyat, khususnya golongan berpendapatan rendah mendapat kemudahan perumahan yang berkualiti," titah baginda.

Seri Paduka bertitah, kerajaan juga akan memastikan pembabitan wanita dalam pembangunan negara terus meningkat dengan menyemak semula undang-undang yang membezakan asas jantina serta memberi perhatian kepada masalah keganasan dan gangguan sosial.

Baginda bertitah, pembangunan sosial dan pengukuhan perpaduan juga akan diberi lebih tumpuan dengan Dasar Sosial Negara dimuktamadkan dan Rukun Tetangga diberi nafas baru bagi membolehkan ia menjadi penggerak dan mekanisme perpaduan serta pembangunan sosial.

(END)